



Aqqalu C. Jerimiassen

UKA 2020/19

Atassut

08. Oktober 2020

**Uunga siunnersuut: Soraarnerussutisiaqalernissamut aaqqissuussinermut
peqataasussaatitaaneq pillugu Inatsisartut inatsisaata allanngortinneqarnissaa pillugu
Inatsisartut inatsisaat nr. xx, xx. xxx 2020-meersoq.**
(Aningaasaqarnermut Naalakkersuisoq)

Inuup aningaasaatini sumut atussanerlugit nammineq akisussaaffigissavaa, suminngaanniilluunniit pisortaninngaanniit naqisimaneqassanngilaq akissarsiorlualaalernermini ilanngartuunneqarnissaminut sumulluunniit pinngitsaaliissummik akileraartitaanissaminut.

Akitsuusersuereerluta maanna inuuneq nunatsinni atorparput kiffaangissuseq piiarlugu qulaaniilli inuk qanoq aningaasaqarnermingut ingerlaniassanersoq naalakkisaartinniarlugu, ajoraluaqaarli tamassumunnga aallartissimangatta. PFA Soraarnek matullarmat katersannguatta ilangaatsiarujussui nunatta kaasarfimmiliutereermagit, pinngitsaalilluta akilersuisussaatitaasussanngorpaatigut, taakkualu akilersuisimangitsut pillarlugit ukioq akileraarfianni 50% angullugu Skattekortiani procentilerlugit.

Eqqanaraluttuaq siunissamut taamatuinnaq ingerlaniarutta, imaattussaanngikkaluarnerpami nunatsinni najungalik tassaassasoq kiffaangissuseqarnerpaalluni sapinngisamik annikinnerpaamik pisortanit pitusimaneqarluni inuuniartussaasusaaq, ingasammik talerperlernik taaneqartartunik naalakkersuisooqatigiinniittoqartillugu?

Taamaangilarli, maanna nunarput ingerlajartorpoq inuk kinaassusaajarlugu meerannguatut nammineersinnaanngitsutut akisussaaffiarlugu tatiginangu pilersimallugu, aaliuku namminiilivinnissamik ulapputeqartuusut nunatullu pisoorsuunerput erseqqissarniartuarlugu, qanormitaavaana angorussimangaat namminiilivinnissaaq innuttaasulluunniit tatigisinnaanissaanut killeqarfigisimangunikkit?

Atangu nunaqqaterput tatiginerulaartigu, akisussaaffik eqiterussinermut annertuallaamut atorsimasarput maanna innuttaasunut utertilaartigu. Kinaluunniimmi inuk nunamini pisortaniik tatigineqartutut misigisimasinnaasariaqarmat, systemikkut utaqqiinnartunngorsangaanani.

Innuttaasut qitiutillugit sulinitsigut inuiaqatigiinni toqqissisimaneq pilersinniangassaraarput, puigunngisaannartigulumi kikkut sullinnerlutigit, naalakkersuisummi inatsisartulluunniit sulinerat oqilisarniarsarissanngilarput innuttaasut kingullinngorlugit, tamanna killormorluinnaq

iluseqartussaavoq, innuttaasunuku ajornannginnerpaamik inuuneqarnissaat toqqissillutillu inuunissaat suliassarigipput eqqanaassallugu maani.

Inuusuttoq aatsaat inersimasutut inuuneqalernissaminut illutaarsinnaalerumaarnissaminut katersinissamik siunertaqarluni aallartittoq naallerniangassarinnngilarput, imaattariaqanngilaq; ukiup siulia katersipiloorniarsaraluni sulinermini utoqqalinersiaqalernissamut ileqqaarinngitsoorsimanini pillugu akileraarutitigut 50% angullugu pillarneqartariaqalissasoq. Atagu nunaqqapput periarfissilaartigu, takusinnaalereerparpummi maanna taamannak aaliangersimanermi katersisinnaanissaangalumut, inuup nammineq aningaasaatimi sumut atorsinnaaneranut kiffaanngissusaanik sakkortunerpaamik arsaartorniarsaralutigit.

Warszawapagtip nunatarisimasaasa ingerlariuserisimasaat ila ornikkuunnaalaatsiartigu, taannami aningaasaqarnikkut eqiterussipiluunerluni ingerlatsinerusimaneq nunat taakkua uppikaapiloornerinik kinguneqarpoq, sooq taava uagutsinnut iluatsissua ila suli eqiterussiniartuarutta qulaaniillu innuttaasorput aqunniartuarlugu?

Atassummiik siunnersuut itigartipparput, pinngitsaaliissummillu soraarnerussutisiaqalernissamut katersisussaatitaanermut inatsisiliarineqarsimasoq atorunnaarsilluinnarneqarnissaanik inatsisartut kaammattorlugit, kiffaanngissusiianeq nunaqqatitsinnut naammalerpoq.